

Ed.

695. Breytingartillögur

við frv. til l. um fræðslu barna.

Frá Jónasi Jónssyni.

1. Við 3. gr. Í stað orðanna „getur fræðsluráð þá veitt“ í 1. mgr. komi: skal fræðsluráð þá veita.
2. Við 9. gr. Niðurlag greinarinnar orðist svo: enda samþykki hlutaðeigandi fræðsluráð og skólanefndir skiptinguna.
3. Við 13. gr. Aftan við greinina bætist ný málsg., svo hljóðandi:
Nú reisir kaupstaður eða kauptún sumarheimili í sveit, þar sem börn úr hlutaðeigandi verzlunarstöðum dveljast sumarlangt við ýmiss konar útistörf undir stjórn kennara sinna, og skal rikið þá greiða hálfan stofnkostnaðinn, enda samþykki fræðslumálastjórn teikningu af sumarheimilinu og framkvæmd verksins.
4. Við 16. gr.
 - a. Á eftir orðunum „viðurkenndu kennaraprófi“ í fyrri málsg. komi: eða guðfræðiprófi frá Háskóla Íslands.
 - b. Í stað orðanna „tveggja ára“ í síðari málsg. komi: fjögurra ára.
5. Við 17. gr.
 - a. Í stað „36 kennslustundir“ í 1. mgr. komi: 32 kennslustundir.
 - b. Í stað „40 mín.“ í 3. gr. komi: 50 mínútna.
6. Við 29. gr. Greinin orðist svo:
Skólanefnd veitir móttöku umsóknum um kennarastöður. Skal hún leita áhlits skólastjóra um umsækjendur, ef velja á kennara, en námsstjóra, ef velja á skólastjóra. Ef meiri hluti skólanefndar og fræðsluráðs mælir með umsækjanda, veitir fræðslumálastjórn honum stöðuna. En verði ágreiningur milli skólanefndar og fræðsluráðs, sker fræðslumálastjórn úr og veitir einhverjum af umsækjendum stöðuna.
7. Við 35. gr.
 - a. Orðið „átthagafræði“ í 1. mgr. falli burt.
 - b. Á eftir orðinu „Íslandssögu“ í 2. mgr. kemur: mannkynssögu.
 - c. Í stað orðanna „eitt erlent mál“ í 3. mgr. komi: ensku.
8. Við 36. gr. Aftan við greinina bætist ný málsg., svo hljóðandi:
Börn innan 12 ára aldurs má ekki senda í skóla í skammdeginu fyrr en ratið er orðið. Ákveða skal í reglugerð eftir tillögum heilbrigðisstjórnar, hve margar stundir skólabörn í hverjum aldursflokki mega sitja dag hvern á skólabekk við bóklegt nám.
9. Við 37. gr. Greinin orðist svo:
Skólar í kaupstöðum og kauptúnum, sem reistir verða með styrk úr ríkissjóði samkvæmt lögum þessum, skulu vera gerðir fyrir 300 börn í mesta lagi, Leitast skal við að kenna tilteknar bóklegar greinar, svo sem landafræði, nátt-

úrfræði og sögu, í kvikmyndahúsum, með skuggamyndum, kvikmyndum og leiksýningum, eftir því sem aðstaða leyfir. Ekkert barn má stunda nám í barnaskóla meira en 7 mánuði ár hvert. Önnur ákvæði um skólagöngu barna skal setja með reglugerð.

10. Við 38. gr.

a. Upphaf greinarinnar orðist svo:

Í heimavistar- og heimangönguskólum í sveitum skal skipta námstímanum á þann veg að ekkert barn fái meira en 3½ mánaðar skólagöngu o. s. frv.

b. Aftan við greinina bætist ný málsg.:

Þar sem bæjarfélag reisir samkvæmt lögum þessum dvalarheimili í sveit fyrir börn, sem ekki eiga aðgang að sumarðvöl á sveitaheimilum, skulu þau börn, sem skólanefnd útvegar þar sumarvist, teljast skólaskyld og hlýða skólagaga. Á þessum dvalarheimilum skal hafa öll þau húsdýr, sem tamin eru á Íslandi, og auk þess báta til notkunar undir eftirliti kennara, ef þess er kostur. Skulu börnin venjast við sem fjölbreyttasta útileiki og störf við framleiðsluna til lands og sjávar, sem eru við þeirra hæfi. Um rekstur dvalarheimila skólabarna úr kaupstöðum og kauptúnum skal að öðru leyti ákveðið í reglugerð.

11. Ákvæði til bráðabirgða skal orða svo:

Þar, sem ekki eru komnir fullnægjandi heimangöngu- eða heimavistar-skólar, skal fræðslumálastjórn í samráði við fræðsluráð, skólanefndir og námsstjóra skipa þeim málum eftir því, sem bezt hentar hagsmunum viðkomandi aðila. Leggja skal áherzlu á að fá presta til að taka að sér kennslu og kennslu-eftirlit barna í dreifbýli, eftir því sem tími þeirra og kringumstæður leyfa.